

Monsieur

Je suis tres mary qu'il me faut de nouveau vous importuner de mes lettres parmi vos serieuses et importantes occupations, mais la necessite' m'y contrainant i'espere que ne le trouueres mauuais. Ces lignes donc sont pour vous prier pour l'adresse des cy jointes que i'ay creu estre obligé d'enuoyer et que puis que ie suis contraint de faire vn voyage vers Madame ma mere ne scachant si iamais ie reuiendray en ces quartiers en cas que Monsieur le Prince d'Orange se rendist tost ou tard Maistre d'Anuers de vouloir auoir pour recommandé la rente de deux mille liures amuels que laditte ville doit a Maditte Dame et dont elle n'a receu vn Sol depuis l'issue de la derniere trefue, Outre ce Monsieur il y a le Baron de Honsbroect Gentilhomme de condition demeurant pres d'icy quy ma prie de vouloir interceder pour luy enuers Monsieur mon Oncle touchant vne rente amuelle d'vnze cent soixante florins de dixhuict milles cinq cents florins en capital qu'il pretend sur la terre de Linghen et dont depuis l'an mil six cent trente deux il n'a esté payé. Ce que ne luy pouuant d'vn costé refuser et d'autre n'en voulant interrompre Mondit Sieur, puis qu'il s'en remest en telle matiere a son conseil, Fay voulu requerir vostre courtoisie Monsieur lors que serrez de retour a la Haye de luy faire ceste faueur et a moy qu'il peust en cas que Mondit Sieur le Prince ne soit redeuable de telle dette recevoir sentence de finitiue de son conseil pour recourir a ses garands, autrement ie tascheray si on la pour agreable de trouuer moyen de le contenter a peu de frais l'affection que i'ay pour la Maison de Monsieur mon Oncle, m'y porte plus que nulle autre raison. Jen ay escrit a Monsieur Buseroy par deux fois sans auoir responce. La fiance que i'ay en vce bienveillance me fait user de ceste liberte' vous me le pardonnerez sil vous plaist et accuserez mon malheur si iusqua present ie ne vous ay fait paroistre par les effects combien veritablement ie suis.

Monsieur

Vous m'excuseres sil vous plaist enuers Messieurs les Princes que ie ne leur escriis de ma main propre, mon affliction ne me le permettant.

Vre bien humble a vous  
rendre seruire  
Frederic Louys Comte Palatin

13

Düsseldorf le 25. 8bre 1645.



*[Faint, illegible handwritten text, likely bleed-through from the reverse side of the page.]*

*[Handwritten signature and name:]*  
J. van der Burgh  
van der Burgh

*[Faint handwritten text at the bottom right corner.]*







*10/10*